

السؤال الأُفوكاتو

إجابات لأُسئلة قانونية
لمجتمعاتنا* في مصر



الدعم القانوني
بمنظمة بداية

*مجتمعات المثليات/ين وثنائيات/ي الميول الجنسية والعابرات/ين جنديا وبينيات/ي الجنس واللا جنسيات/ين وشموليات/ي الميول الجنسية ولا ثنائيات/ي الهوية الجندرية.

معايًا فيديو لوالدي وهو يقول إنه عايز يقتلني، ممكن أعمل بيه محضر أو أرفع عليه قضية؟ وهل لو عملت كذا وهو قال ابني شاذ وبريبه أو حاجة من هذا القبيل، دا هينعكس عليا بالضرر؟

المثلية الجنسية مش جريمة في الدولة المصرية، فإتهام والدك ليك "بالشذوذ" مش بيأثر بشكل عام على سير المحضر. ممكن يتعمل محضر عدم تعرض وممكن يترفع قضية تهديد كمان في بعض الحالات، ودي بترجع لتقييم النيابة وقد إيه التهديد دا كان حقيقي. وفي الواقع في حالات المشاكل الأسرية، السلطات بتأخذ صف الأب غالبًا.

يعني لو أنا حد ما عندهوش القدرة على إني أحمي نفسي بنفسي يبقى أستنى لما يبقى يقتلني وساعتها يبقى حقي يجيلي؟

القانون المصري قانون محدود في نطاق المشاكل الأسرية، والأجهزة التنفيذية في الدولة بتفضل عدم التدخل في الموضوع دا، بس لو تمسكت إنك تعمل محضر، الضابط هيعمل المحضر ولو رفعت دعوى النيابة لابد أنها تحقق فيها. ولو تحت سن 18 ممكن تتصل بخط نجدة الطفل وبيقوموا بالتحقيق الفوري.

ولو محتاج مساعدة في عمل المحضر أو رفع دعوى ممكن تبعتلنا على legal.aid@bedayaa.org

أنا عارف إن قانون الفجور هو القانون اللي ممكن يتقبض عليا بيه بس هل فيه قوانين تانية ممكن يتقبض عليا بيها؟ وهل بتعرض على نيابة عادية ولا نيابة أمن الدولة؟

بخلاف قانون الفجور، فيه بعض المواد المطاطة اللي ممكن استخدامها ضد مجتمعاتنا، زي الفعل الفاضح في الطريق العام وتحريض المارة على الفسق والفجور. بالإضافة لدا في 2018 مصر أقرت قانون الجرائم الإلكترونية اللي فيه مواد مطاطة تخص حماية القيم الأسرية ودي ممكن تستخدم ضد مستخدمي مواقع المواعدة الإلكترونية الخاصة بمجتمعاتنا أو الناس اللي عندها صفحة إلكترونية على وسائل التواصل الاجتماعي

النيابات المختصة بالقواصي دي هي النيابات العادية، ماكانش فيه غير واقعتين بس اللي نيابة أمن الدولة حقت فيهم بشكل مباشر وهم كانوا حادثة العلم وحادثة الكوين بوت.

أنا ترانس ومن وعليا جيش ممكن أعمل إيه ؟ تقدرنا تساعدوني في موضوع الجيش؟ تقدرنا تساعدوني أغير البطاقة والأوراق بتاعتي؟

في حالة الرغبة في الحصول على الإعفاء طبيا بتقدمي عادي وفي الكشف الطبي بتطلبي تتعرضي طب نفسي وتقولني إن عندك اضطراب الهوية الجندرية بعد كذا بيتم تحويلك لجنة طبية عليا مكونة من 3 دكاترة أقل رتبة مقدم ودول بيحاولوا يتأكدوا إنك فعلا مش بتكديبي وإنك فعلا ترانس، اللجنة دي بتبقى في حلمية الزيتون أو المركز الطبي العسكري في القبة، بعد كذا لو كله تمام، بيتم إعطاء أعفاء غير لائق طبيا وأحيانا بيتم تحديد السبب غير لائق طبيا نفسي.

للأسف التقديم في الجيش والإعفاء دا مسألة لابد الشخص ذات نفسه هو اللي يروح ومينفعش حد ينوب عنه، بالنسبة للأوراق، ممكن تبعتيلنا إيه وضعك بالضبط من أوراق وعمليات وهنرد عليك هل بالإمكان المساعدة أو لأ على legal.aid@bedayaa.org

أنا بنت مثلية عمري 18 سنة، أهلي عرفوا وحبسوني وضربوني، عرفت أهرب منهم، دلوقتي عايزة أعمل أي حاجة قانونية أقدر أحمي نفسي منهم، أعمل إيه؟

من حيث المبدأ مفيش قانون في مصر يحمي من العنف الأسري، لكن ممكن عمل محضر عدم تعرض وإثبات حالة إذا وجدت أي إصابات جسدية أو ما يثبت التعرض للضرر. وإن كانت الاختيارات دي موجودة، من الصعب التنبؤ بالنتيجة بسبب ذكورية ضباط الشرطة في التعامل مع الحالات دي. ممكن كمان التواصل مع الخط الساخن لحماية الطفل إذا كنتي تحت 18 وخط حماية المرأة إذا كنتي فوق 18.

هو أنا لو عملت لجوء فعلا لأي بلد بيعملوا مشاكل لأهلي في مصر؟ وأنا ماينفعش أرجع هنا تاني؟

اللجوء في الخارج مالهوش علاقة بمصر، ومصر مش بيتم إعلامها بأي شكل من الأشكال من السلطات المختصة باللجوء بالحالات المصرية اللي بتقدم على اللجوء. من حيث المبدأ في حالة اللجوء في بعض البلدان بيكون من الصعب العودة إلى مصر بشكل مؤقت لحد ما تاخدي الجنسية علشان الباسبور المصري في بعض الأحيان بيتم التحفظ عليه مع سلطات البلد. وعلى العموم كل بلد وليها نظامها، قبل ما تسافري لازم تقرا وتتأكد/ي إن البلد فيها المواصفات المناسبة ليك/ي.



أنا اتمسكت في قضية فجور من سنتين وخذت حكم سنة ونزلت في الاستئناف ل 6 شهور، قضيت المدة وخرجت. دلوقتي لما جيت أقدم على شغل طلبوا مني فيش وتشبيه، خايف أطلع له بيان إني كان عليا قضية. هل فعلا بتظهر القضية في الفيش والتشبيه؟ وهل فيه حاجة ممكن أعملها؟

من حيث المبدأ، ممكن التقدم بقضية رد اعتبار تنظر فيها المحكمة الجنائية التابعة لقسم الشرطة اللي عليه بطاقتك ودا لو في حالة إنك ماعملتش نقض وبعد 3 سنين. بعد قضية رد الاعتبار بيترفع قضية في مجلس الدولة اسمها محو تسجيل جنائي وكدا يبقى اتشال كل حاجة. القضية المفروض تظهر في الفيش كسوابق. لو حابب نساعدك في المحو ممكن تبعتلنا تفاصيل القضية على legal.aid@bedayaa.org

هل الشات بتاعي يعتبر دليل ممكن المحكمة تاخذ به لإثبات التهمة؟

محتوى الشات ممكن يعتد كدليل وإن كان دليل ضعيف يمكن الدفع ببطلانه لأنه بكل بساطة شات خاص ما بين شخصين وليس به أركان جريمة الإعلان علشان الشات مش إعلان على عامة. وكمان الشات لو مافهوش أي حاجة تدل على إنك عامل بالجنس التجاري (الدعارة) وهو دا اللي القانون بيجرمه، يبقى الشات مش بيثبت أي حاجة.

طيب إزاي الشات ساعات بيستخدم كدليل؟

الموضوع بيرجع للقاضي، لو حاسس إن الشخص فيه دلائل تانية مش الشات بس تدل إنه معتاد ممارسة الفجور بدون تمييز وبأجر مادي فساعتها بيعتبر الشات دليل إضافي بس كمان لو الشات فيه دعوة صريحة لممارسة الفجور بمقابل مادي أو اعتراف ضمني على الأكونت إن الشخص شغال في الجنس التجاري. وفي النهاية الشات لو حده بيبقى دليل ضعيف والنيابة بتلجأ له مع أدلة تانية تدعمه دايمًا.

أنا كنت متطوع في جمعية خيرية وحد فيها عرف إني مثلي الجنس، المهم إنه بلغ عني ومسك شات بيني وبين حد كنت معترف فيه إني مثلي واثبتت معايا في الجمعية و خايف يرفعوا قضية ضدي ومش عارف أعمل إيه.

المثلية مش مجرمة في القانون المصري، المجرم هو ممارسة الجنس التجاري. وبالتالي مفيش حاجة اسمها إن حد يرفع قضية عليك علشان انت مثلي.

إزاي أأمن نفسي وأنا رايق أقابل حد؟ وهل فيه حاجة معينة أعرف منها هل هو شخص أمان ولا ممكن يطلع شرطة أو حرامي.

طريقة الكلام على الأليكشن، لو الشخص بيحاول يعرض فلوس أو يحول الكلام لكلام مادي، فدا يبقى خطر وكمان لو هو مصمم إنك تبعته صور نودز ووشك فيها، وحاول تتأكد من هوية الشخص، دور عليه على السوشيال ميديا قبل ما تروح ولو قررتوا تنقلوا الكلام برة الأليكشن حاول تستخدم وسائل تواصل آمنة (زي سيخال أو واين) أو على الأقل نمرة واتساب مش متسجلة باسمك. اتفق دايمًا إن المقابلة في مكان عام مغلق يعني مش في الشارع، لكن جوة كافيه أو مطعم. وانت رايق، لو مش واثق في الشخص يستحسن تغير الموبايل ويكون معاك موبايل صغير مش سمارت مش عليه حاجة ولو دا مش متاح، شيل أي حاجة علي موبايلك ممكن تخلي الشرطة تشك فيك (صور، تطبيقات مواعدة، فيديوهات وهكذا) سيب خبر إنك رايق تقابل حد مع حد من صحابك وخليه يطمئن عليك كل شوية علشان لو حصلت حاجة لا قدر الله يعرف يوصلك.

أنا كان حصلي ابتزاز وأنا قاصر وصورني أثناء العلاقة ومش عارف أعمل إيه وخايف أهلي يعرفوا.

لو الشخص دا صلتك انقطعت بيه حاول تتجاوز الموضوع دا وتلجأ للدعم النفسي، لكن لو الشخص دا لسة بيهدهك فياريت تتواصل مع المحامين الخاصين بينا في أقرب وقت على legal.aid@bedayaa.org

عايزة أعرف في حالة القبض، إيه اللي ممكن أقوله ويساعد المحامي إنه يثبت إنها حق شخصي مش عام، وبالتالي إيه اللي لازم ماقولوش؟

في حالة التعرض للقبض من قبل الشرطة لا يجب أن تدلي بأي أقوال أو اعترافات تثبت إنك من مجتمعاتنا. تمسك بحقك في حضور محامي معك في التحقيق. ويفضل التخلص قدر الإمكان من أي محتوى على الهاتف يربطك بمجتمعاتنا. وافتكر دايمًا الميم الثلاثة: **ماعرفش ماحصلش مش حاجتي**.

مش حاجتي

ماحصلش

ماعرفش

إيه الوضع القانوني في قضايا الفجور في المحاكمات العسكرية ضمن حوادث داخل المؤسسات العسكرية وإيه وضع المحامي والأحكام والعقوبة وتقضيتها والوضع القانوني نفسه؟

أولاً: القانون بيعاقب على "اعتياد" ممارسة الفجور، والاعتياد معناه هو تكرار فعل الممارسة في مناسبتين مختلفتين، في شرط ثاني وهو إن اعتياد ممارسة الفجور يكون لإشباع رغبات الغير بلا تمييز (الجنس التجاري فقط)، وطبعاً مش سهل أبداً على مجتمعنا وبصفة خاصة مجتمع القضاة والقانونيين إنهم يتقبلوا الحقيقة القانونية دي بسبب الخلفية الذكورية.

ثانياً: بالنسبة للعقاب المرصود في القانون لاعتياد ممارسة الفجور الحبس، مدة لا تقل عن ثلاثة أشهر ولا تزيد على ثلاث سنوات وبغرامة لا تقل عن خمسة وعشرين جنيهًا ولا تزيد على ثلاثمائة جنيه أو بإحدى هاتين العقوبتين.

ثالثاً: بالنسبة لكون التهمة دي اتوجهت لشخص ما في مؤسسة عسكرية فالموضوع بيبقى أصعب لأن بالإضافة لتهمة اعتياد ممارسة الفجور، هيلقي تهم ثانية جنائية وانضباطية في قانون القضاء العسكري، وبالتالي دا هيبقى صعب معاه نحدد فترة العقوبة المتوقعة.

رابعاً: عقوبة العسكريين بتكون في سجون حربية مش في السجون المدنية العادية.

أنا اتبضرت قدام عيلتي، ممكن أعمل إيه عشان أسافر بسبب التهديد اللي بيحصلني هنا، وانتو ممكن توفرولي إيه عشان أسافر؟

للأسف منظمة بداية مش بتقدر تساعد حد على السفر بس فيه مجموعة من الخدمات الثانية ممكن نقدمها داخل مصر ممكن تساعدك في مشكلتك للمزيد من المعلومات ممكن تبعتلنا على legal.aid@bedayaa.org

أنا 16 سنة واتعرف في البيت إني مثلي وخايف من رد فعلهم إيه اللي ممكن أعمله عشان أحمي نفسي منهم؟

في حالة تعرضك للاعتداء البدني أو الاحتجاز من قبل عائلتك من حقك تتصل بخط نجدة الطفل وتبلغ بالاعتداء، وممكن تعمل محضر ضدكم في القسم.

هل القانون يمنع أو حاطط ضوابط إجراء العمليات للترانس؟ ولو لأ فيه متوقفة من سنتين؟

القانون المصري مافهوش أي ذكر لموضوع العبور الجنسي، الموجود هو مجموعة من اللوائح الداخلية بنقابة الأطباء ووزارة الصحة اللي بتسير شؤون العبور الجنسي في مصر.
اللجنة متوقفة وتعمل بشكل متقطع بسبب عدم الاجتماع وغياب أفراد اللجنة وتعنت الأزهر أحيانا في الموافقة على الأوراق

لقد وصلتنا هذه الأسئلة من أفراد مجتمعاتنا وقام فريق الدعم القانوني لدينا بالإجابة عنها، ولازلنا نستقبل الأسئلة في أي وقت ونجيب عنها الساعة الثامنة من كل يوم أربعاء.
يمكن إرسال الأسئلة إلى صفحة بداية على فيسبوك أو حساب ask.fm أو البريد الإلكتروني.

www.facebook.com/bedayaa1

www.ask.fm/ucareem05

legal.aid@bedayaa.org



الدعم القانوني
بمنظمة بداية